



Amaran!

Pihak Jabatan Agama Islam Perak tidak bertanggungjawab ke atas sebarang penambahan ayat selain daripada kandungan khutbah yang dikeluarkan.

" KEISTIMEWAAN RAMADAN "

16 April 2021 / 4 Ramadan 1442

الْحَمْدُ لِلَّهِ¹ الْقَائِلِ:

يَا أَيُّهَا الَّذِينَ ءَامَنُوا كُتِبَ عَلَيْكُمُ الصِّيَامُ كَمَا كُتِبَ عَلَى الَّذِينَ مِن قَبْلِكُمْ لَعَدَّكُمْ تَتَّقُونَ

(Surah Al-Baqarah ayat 183)²

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.
اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ³ وَعَلَى آلِهِ وَأَصْحَابِهِ وَالتَّابِعِينَ لَهُمْ بِإِحْسَانٍ إِلَى يَوْمِ
الدِّينِ. أَمَّا بَعْدُ، يَا عِبَادَ اللَّهِ! اتَّقُوا اللَّهَ⁴ أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Sidang Jumaat yang dirahmati Allah,

Marilah kita tingkatkan ketakwaan kepada Allah SWT, menyempurnakan ibadah-ibadah yang khusus dilakukan dalam bulan Ramadan; semoga kita beroleh kebahagiaan di dunia dan di akhirat. Bersempena hari Jumaat pertama dalam bulan Ramadan yang penuh berkat ini, khatib akan membicarakan khutbah bertajuk: "Keistimewaan Ramadan".

Sidang Jumaat yang dirahmati Allah,

Hari ini, hari keempat bulan Ramadan. Semoga ibadah puasa yang kita lakukan pada tiga hari pertama Ramadan tahun ini, diterima oleh ALLAH SWT sebagai amalan puasa yang sempurna, melayakkan kita dilimpahi ganjaran yang doa kita tidak akan ditolak, seperti Sabda Nabi SAW:

ثَلَاثَةٌ لَا تُرَدُّ دَعْوَتُهُمْ : الصَّائِمُ حَتَّى يُفْطَرَ ، وَالْإِمَامُ الْعَادِلُ ، وَدَعْوَةُ الْمَظْلُومِ

Maksudnya: Tiga golongan yang doanya tidak akan ditolak sekiranya mereka memohon kepada ALLAH ialah, orang yang berpuasa sehingga dia berbuka puasa, pemimpin yang adil

¹ Memuji Allah

² Ayat Al-Quran

³ Selawat ke atas Nabi Muhammad SAW

⁴ Pesan Taqwa



dan orang yang dizalimi.

(Riwayat Imam Tarmizi 3598)

Hari ini, ialah hari keempat kita berpuasa; hari keempat, kita menukar gaya hidup harian. Sudah empat hari, kita memulakan kehidupan harian dengan bangun daripada tidur pada awal pagi untuk bersahur, menggantikan amalan bersarapan pagi yang lazimnya dilakukan selepas solat subuh atau lebih lewat daripada itu. Kita mendisiplinkan diri untuk tidak makan dan tidak minum dari waktu imsak sehingga waktu maghrib, selama 13 jam setengah. Keupayaan tidak makan dan tidak minum selama tempoh tersebut, dilakukan bukan sahaja oleh orang dewasa, malah turut dilakukan oleh anak-anak yang belum mencapai usia baligh, bermula seawal usia 7 tahun, yang baru mula bersekolah rendah. Malah, dalam kalangan yang lebih muda, yang masih berada dalam lingkungan usia di TADIKA, anak-anak mula dibimbing dan dilatih untuk berpuasa selama beberapa jam atau separuh hari.

Demikian kuatnya semangat umat Islam melaksanakan ibadah puasa, yang turut diperkenalkan, dilatih dan dibimbing kepada anak-anak, bermula sejak mereka masih di TADIKA. Demikian pula, terbukti keupayaan biologi atau keupayaan fizikal tubuh manusia, memiliki daya tahan, boleh hidup dan boleh bekerja seperti biasa, walaupun tidak makan dan tidak minum selama lebih daripada tiga belas jam.

Puasa membuktikan, bagaimana minda atau otak berkuasa mengawal tubuh badan manusia. Apabila minda menetapkan program untuk tubuh tidak perlu makan dan tidak perlu minum sepanjang siang, tubuh akan patuh; tubuh akan melakukan pengubah suaian selaras dengan azam yang telah ditetapkan oleh minda.

Demikian kuasa minda mempengaruhi tindak tanduk tubuh badan manusia, begitu juga mempengaruhi budaya hidup harian manusia. Kuasa minda yang telah berjaya mendisiplinkan tubuh melakukan ibadah puasa, perlulah dijadikan iktibar untuk umat Islam turut menggunakan kuasa minda, mendisiplinkan diri melakukan perkara-perkara lebih besar dan lebih mencabar ketika menghadapi alam belajar, alam pekerjaan dan alam perniagaan, agar umat Islam berjaya mencapai kejayaan yang lebih gemilang.

Sidang Jumaat yang dirahmati Allah,

Tidakkah aneh dan pelik, apa yang menurut hukum akal, dianggap perintah berat yang diwajibkan ke atas manusia, untuk tidak makan dan tidak minum pada siang hari selama sebulan, tetapi disambut dengan riang oleh umat Islam setiap kali datangnya Ramadan. Sikap redza serta rasa riang menyambut puasa, meskipun berlapar dan berdahaga, merupakan anugerah istimewa ILAHI kepada hamba-hamba Nya yang beriman.



Setelah tabah menahan diri daripada makanan, minuman dan hubungan kelamin sepanjang siang, pada waktu malam, umat Islam begitu bertenaga meningkatkan ibadah. Bilangan jemaah di masjid bukan sahaja lebih ramai daripada bulan-bulan biasa, malah amalan-amalan di masjid turut bertambah; bulan Ramadan, ialah satu- satunya bulan, ibadah solat tarawih diperkenalkan, dan dilakukan secara berjemaah dalam suasana meriah dan ceria. Demikian antara keistimewaan secara tersurat yang dapat disaksikan dalam bulan yang ALLAH jadikan tersangat istimewa ini. Di sebalik keistimewaan yang tersurat ini, terkandung lebih banyak rahsia keistimewaan yang tersirat, antaranya, dalam bulan ini, Al-Quran diturunkan ke dunia; dan dalam bulan ini terdapat satu malam yang sangat berkat lagi istimewa, dikenali sebagai Malam Lailatulqadar, iaitu malam lebih afdal daripada seribu bulan.

Sidang Jumaat yang dirahmati Allah,

Berbanding Ramadan pada tahun 1441 Hijrah, alhamdulillah Ramadan pada tahun ini, dapat disambut dalam suasana yang membolehkan umat Islam mengimarahkan rumah-rumah Allah, berbuka puasa, bersolat fardu, bertarawih, bertadarus, berqiamullail, bersahur dan beribadah di masjid dan surau. Pasar-pasar Ramadan dibenarkan beroperasi, serta manusia juga lebih bebas untuk bergerak, bekerja dan berniaga walaupun masih tertakluk kepada syarat dan peraturan yang ditetapkan oleh Majlis Keselamatan Negara dan Kementerian Kesihatan.

Dalam menikmati kelonggaran yang diberikan ini, wajib diperingatkan, masalah pandemik virus Covid-19 masih belum berakhir. Angka-angka jangkitan masih tinggi. Barisan petugas hadapan masih menghadapi cabaran besar. Oleh itu, kita turut mempunyai tanggungjawab memastikan penyebaran wabak ini dapat dibendung. Setiap warganegara, begitu juga warga asing yang berada di negara ini, hendaklah menyahut seruan kerajaan, mendaftar diri untuk menerima vaksin. Sedarkanlah ahli keluarga dan jiran tetangga agar mendaftar, memenuhi tanggungjawab fardu kifayah, membantu program vaksinasi kerajaan untuk menangani jangkitan virus Covid-19.

Hargailah kelonggaran syarat yang kita nikmati ini dengan mematuhi segala peraturan yang telah ditetapkan untuk kebaikan kita. Ketika berada di tempat awam, patuhi jarak fizikal yang telah ditetapkan, elakkan diri daripada melakukan sentuhan fizikal, sentiasa memakai penutup muka dan segera mandi dan bertukar pakaian sebaik sampai di rumah. Elakkan daripada mendedahkan anak-anak kecil dan warga tua, dengan membawa mereka sewaktu berkunjung ke pasar Ramadan, begitu juga ketika membeli belah keperluan Hari Raya di



gedung-gedung perniagaan. Jauhkan diri dari kawasan yang terdapat manusia berkumpul terlalu ramai.

Ramadan masih berada pada peringkat awal. Jangan kerana kealpaan, jangan kerana kecuaiian dan jangan kerana perbuatan tidak bertanggungjawab, kita menjadi punca yang meningkatkan bilangan jangkitan pesakit, hingga boleh menjejaskan hasrat umat Islam mahu menyambut Syawal tahun ini dalam suasana riang dan gembira.

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْعَفُورُ الرَّحِيمُ.

Khutbah Kedua

الْحَمْدُ لِلَّهِ⁵ حَمْدًا كَثِيرًا طَيِّبًا مُبَارَكًا فِيهِ، مِلءَ السَّمَاوَاتِ وَمِلءَ الْأَرْضِ، وَمِلءَ مَا بَيْنَهُمَا وَمِلءَ مَا شِئْتَ مِنْ شَيْءٍ بَعْدُ. وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلِّمْ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ وَكُونُوا مَعَ الصَّادِقِينَ.

Kaum muslimin yang dirahmati Allah,

Mimbar menyeru para jemaah agar kita istiqamah berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin, hingga ke hari ini. Jagalah hubungan dengan Allah SWT dan sesama makhluk. Imarahkanlah rumah Allah SWT dengan terus-menerus mengerjakan ibadah dan solat fardu secara berjemaah.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا⁶

⁵ Memuji Allah
⁶ Ayat Al-Quran



اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي الْعَالَمِينَ إِنَّكَ حَمِيدٌ مَجِيدٌ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ⁷، وَأَصْلِحْ ذَاتَ بَيْنِهِمْ وَأَلْفَ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ وَالْحِكْمَةَ، وَتَبِّتْهُمْ عَلَى مِلَّةِ رَسُولِ اللَّهِ ﷺ.

اللَّهُمَّ ادْفَعْ عَنَّا الْبَلَاءَ، وَالْوَبَاءَ، خُصُوصًا وَيْرُوسَ الْكُورُونَا، وَالْغَلَاءَ، وَالْمِحْنَ، وَالْفِتْنَ، مَا ظَهَرَ مِنْهَا وَمَا بَطَّنَ، عَن بَلَدِنَا هَذَا خَاصَّةً، وَعَن سَائِرِ بُلْدَانِ عَامَّةً.

Ya Allah, berkatilah hamba-hamba Mu yang melaksanakan tuntutan zakat dan menghulurkan wakaf, kurniai mereka rezeki yang berlipat ganda, serta sucikanlah harta dan jiwa mereka. Jauhkanlah golongan *fuqara* dan *masakin* daripada kekufuran serta lindungilah mereka daripada kefakiran yang berpanjangan.

Ya Allah, berilah kami kebaikan serta keberkatan di dunia dan di akhirat. Peliharalah kami daripada seksa dan azab api neraka.

Ya Allah, kurniakanlah taufik dan hidayah Mu ke atas Raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah al-Maghfur-lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

فِيَا عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَائِي ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾. فَادْكُرُوا اللَّهَ الْعَظِيمَ يَذْكُرْكُمْ، وَاشْكُرُوهُ عَلَى نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِيكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.

⁷ Doa untuk Kaum Muslimin